

Aña 1998 lo bira e aña di berdad:

DIRECTOR DI SETAR TIN DEN SU PODER E KB RIBA YAMANOTA

ORANJESTAD(AAN) Resultado di eleccion a demostra cu pueblo kier mira cierto desaroyonan tuma lugar na Aruba y cu парти-deran politico mester tene debido cuenta, cu pueblo kier sa e berdad tras di gobernacionnan cu a tuma lugar.

Hopi ta esnan cu a papia y comenta riba KB (Konkinklijk Besluit), pero te awe hopi hende no ta compronde kico ta un KB.

Pa no haci e asunto aki mucho complica por splica pueblo facilmente kico ta un KB y kico ta consecucionan di un KB pa pais Aruba.

Den palabra criyoyo un KB ta nada otro cu un mocion di desconfianza di parti di Hulanda contra e seriedad di gobierno di Aruba.

Un KB ta nifica cu Hulanda ta kita autonomia directo di pais Aruba riba asuntonan cu ta ser menciona den e KB y tal KB ta ser firma pa su Mahestad La Reina.

Na momento cu Hulanda a laga pone un KB riba cabez di un ministro y kita autoridad di un ministro legalmente elegi pa pueblo di Aruba, esaki kiermen cu Hulanda ta tuma e derecho y libertad di no confia e ministro cu pueblo a pone den gobierno.

Cu ayudo di un KB, Hulanda ta tuma over poder di e ministro y dicta den su cartera y asina mete directamente den autonomia di pais Aruba, sin cu e ministro y gobierno di Aruba por haci algo contra esaki.

E instrumento KB ta un arma colonial cu Hulanda ta dispone di dje y mientras cu Hulanda tin e poder pa aplica un KB, nan por haci y deshaci ora cu nan ta haya ta bon.

E KB riba Seguridad Nacional di Aruba tabata e muestra bibo con Hulanda por mete den un aparato valioso di pais Aruba y actua segun anhelo di Hulanda.

E KB riba cabez di ministro Watty Vos cual na prome instancia a ser desmenti door di Prome Ministro Heny Eman a bin resulta di ta un berdad amargo pa gobierno di Aruba.

Cuanto KB (mocion di desconfianza contra gobierno di Aruba y e arma pa mete directamente den autonomia di Aruba) tin scondi den

cierto lachinan di cierto departamentonan?

Manera cu DIARIO a trece esaki hopi biaha caba pa dilanti, ta hopi cos straño a yega di tuma lugar bao guia y responsabilidad di Hulanda: Raport De Ruiter, KB riba Seguridad Nacional di Aruba, Cargo Zaak, raport Koerten cu a lastra famia Mansur di skina pa skina y cu e caso aki te ainda ta den Corte etc etc.

Pero pa pueblo tin hopi mas asunto scondi y poco poco tur cos ta sali na claridad di dia.

Tempo cu DIARIO a señala loke tabata pasando cu Seguridad Nacional na Aruba politiconan enreguista a core bisa No Kere DIARIO!

Despues DIARIO a bin cu fotonan ora cu agentenan secreto di Hulanda tabata saca documentonan di un Van dilanti di postkantoor.

DIARIO a publica e KB cu Hulanda a pusha riba Seguridad Nacional.

DIARIO a alerta pueblo pa Ley di Extradicion y di cual-

ley un ministro a bisa bon cla cu ta, e ta ministro y cu e ley ey no por pasa y cu ningun hende por ser extradita di Aruba; ata e luna aki e promecasonan local di extradicion ta tuma lugar!!!

DIARIO a trece pa dilanti e KB cu a ser poni riba seroe di Yamanota, cual ta encera cu Yamanota no ta cay mas bao patrimonio di pais Aruba mas, pero directamente bao di Hulanda.

Ora cu esaki a sali publica atrobe gobierno a bisa cu no tin KB riba Yamanota!!

Aña 1998 ta e aña di berdad y director di Setar señor Ludwig Jansen ta ser reta pa saca e KB cu ti riba Yamanota y muestra pueblo esaki.

Pueblo di Aruba tin e derecho pa haya si unda y cuanto KB Hulanda a impone riba Aruba pasobra esaki ta e derecho democratico di e pueblo.

E pregunta cardinal awor ta bin pa dilanti di con te awe señor Jansen di Setar no kier duna Ministro Glenbert

Croes e KB?

No ta Ministro Glenbert Croes ta hefe di señor Jansen o por ta asina cu Jansen mester cumpli cu orden di un otro mandatario di coalicion cu a prohibi Jansen pa duna Glenbert e KB?

Señor Jansen ta berdad cu aña pasa riba un anochi Ministro Glenbert Croes a yama bo persona y puntra bo si tin un KB riba seroe di Yamanota y via telefoon bo a admiti esaki y bo a duna di conoce cu bo tin e KB den bo poder?

Señor Jansen bo sa cuanto hende mas a scucha e conversacion aki entre bo persona y Ministro Glenbert Croes kende a yama bo via celular?

Den e mundo moderno aki nada ta keda scondi y kico tin di berdad señor Jansen cu un locutora di radio a haya oportunidad pa wak e KB?

Straño ta cu e locutora aki cu normalmente ta masha critico mes, te awe no a comenta den su programa na

radio encunto e KB cu supuestamente el a haya pa wak ora cu e mes tabata busca cierto informacionnan relaciona cu instalacionan di radio na Aruba.

Esnan cu a bay busca moda pa haya antenna riba seroe di Yamanota mester a bin tende cu NO POR pasobra un KB ta prohibi esaki?

Pa kita tur duda for di caminda, no ta trata di e radio di señor Jossy Mansur pa cual antenna mester a ser poni riba seroe di Yamanota pasobra antenna di radio di Jossy no tabata planea pa ser poni riba Yamanota, manera cu e periodista di awa dushi a publica de su papelucho cu te awe no por logra di ser bendi riba mercado na Aruba.

Palabra awor ta na señor Ludwig Jansen director di Setar pa laga pueblo sa si enberdad Hulanda a kita autonomia di pais Aruba riba seroe di Yamanota.

Kere DIARIO!!!!

PURBA DEN BO GOBIERNO!!

